



26. august 2014

UKA 2014/68

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**UKA2015-mi Naalakkersuisut kalaallinut inuiaqatigiinnut attuumassuteqarnermut inatsisit malittarisassat pillugit nassuiaammik agguasseqqullugit qanorlu ataasiakkaarlutik tulluunnerannut nalilersueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaammi nalilerneqassaaq, innuttaasut pisortanut attaveqartarnerat oqilisarneqarsinnaanersoq kinaassutsimut uppernarsaat, nuna tamakkerlugu atuuttussaq atorneqalersuuppat.**

(Inatsisartunut ilaasortaq Michael Rosing, Demokraatit)

### **Tungavilersuut**

Imaannaangissinnaavoq paasissallugu qanoq ilinerani inuiaqatigiinnut tamakkiisumik ilannguttoqarsinnaanersoq. Pissutaavoq inuiaqatigiit inatsisaanni malittarisassaanilu 50-nik amerlanerusuni attuumassuteqarnissaq ilaammat, aalajangiisuusarmallu inuk annertuumik nunatsinni inuiaqatigiinnut attuumassuteqarnerasoq taamaasillunilu innuttaasutut allatulli pisinnaatitaaffeqassanersoq.

Taamaappoq Kommunimut Inatsisartunullu qinersisarnermi malittarisassat, ilinniarnersiutisiaqalernissamut malittarisassat, initaarniarluni meeqqerivimmiittuuteqalerniarluniluunniit allatsinnermi malittarisassat, piniarnermut allagartamik piniarnermi malittarisassat il.il. eqqarsaatigalugit. Ajornartorsiut ajornerulersarpoq soorlu ilinniartunut, sivisuumik napparsimasunut Danmarkimi katsorsartittunut, innarluutillit kiisalu kalaallit sinniisoqarfiini sulisut eqqarsaatigalugit, pineqartut nunani allamiinnerminni kalaallini inuiaqatigiinni pisinnaatitaaffippaalussuatik annaasarmatigit.

Taamaattumik pingaaruteqarpoq misissussallugu malittarisassat qanoq ataqatigiinnersut aamma inuiaqatigiinni ajornartorsiutinik iluarsiinissamut iluaqutaanersut imaluunniit ajornerulersitsiinnartarnersut.

### **Pisortanut aningaasarsiornikkut allaffissornikkullu kingunissai**

Nalunaarusiorneq aningaasartuutitaqassaaq. Aningaasartuutilli taakku ilinniagartuup ataatsip ukiumi ataatsimi sulinermini atugassaanut 1,0 mio. koruuninut naleqqiullugu anginerunaviangillat.

### **Namminersortunut aningaasarsiornikkut allaffissornikkullu kingunissai**

Naatsorsuutigineqarpoq innuttaasut Kalaallit Nunaat qimallugu aallaqqasimasut angerlaqqikkunik pisinnaatitaaffimminnut pisussaaffimminnullu paasisimasaqarnerulersimassasut. Taamaasilluni angerlaqqinnissaq pilerinarnerulissaaq aamma taamatut taamaasilluni suliffiit namminersortut kalaallinik pikkorissunik, nunani allani misilittagaqartunik, sulisussarsinissaat ajornaannerulissaaq.

### **Innuttaasunut aningaasarsiornikkut allaffissornikkullu kingunissai.**

Naatsorsuutigineqarpoq innuttaasut Kalaallit Nunaat qimallugu aallaqqasimasut angerlaqqikkunik pisinnaatitaaffimminnut pisussaaffimminnullu paasisimasaqarnerulersimassasut.